

BiH: "Elektroprivreda BiH" sprema oporavak rudnika uglja - Stabilizacija poslovanja se očekuje do sredine 2017.

Delegacija Vlade Federacije BiH koju je predvodio Fadil Novalić, premijer FBiH posjetila je juče "Elektroprivredu BiH". Delegacija koju su pored premijera FBiH, činili Nermin Džindić, ministar energije, rudarstva i industrije, Hazima Hadžović pomoćnik ministra poljoprivrede, vodoprivrede i šumarstva, tokom radnog sastanka sa Upravom "Elektroprivreda BiH" upoznata je sa aktuelnim procesima u kompaniji i aktivnostima planiranim u narednom periodu, saopšteno je iz tog preduzeća.

Bajazit Jašarević, v.d. generalni direktor EPBiH je upoznao premijera sa konkretnim koracima koji su poduzeti na poboljšanju poslovanja EP BiH i rudnika u Koncernu EP BiH istakavši da je na osnovu Smjernica Vlade FBiH napravljen Plan poslovanja EPBiH za trogodišnji period kao i Plan mjera za oporavak rudnika uglja, koji bi u narednih 18 mjeseci trebao stabilizovati poslovanje u rudnicima.

Premijer je upoznat sa ključnim procesima u EPBiH - reorganizacija i investiranje u rudnike kako bi se stabilizovala proizvodnja uglja i rudnici učinili samoodrživim, izgradnja zamjenskih termo kapaciteta i proizvodnih objekata iz obnovljivih izvora uključujući kogeneraciju i redukciju emisija i prestrukturiranje EPBiH u skladu sa zahtjevima Evropske unije.

izvor: ekapija.com